


դրօշակներ, մինչև երեկոյ երգի և երաժշտութեան ձայնը չի կտրուում փողոցներում: Երեկոյեան լինելու է նաև հրավառութիւնն:

(Մօակ):

Նոյնպիսի մեծ ոգևորութեամբ մաղթանքներ են կատարուել Շուշի, Շամախի, Սատրախան, Գանձակ, Աղէքսանդրապօլ, Երևան, Կարս, Ախալցխա և այլ բոլոր տեղերում, որտեղ միայն կայ հայ ժողովուրդ և եղեղեցի:

Հարիւրաւոր հեռագիրներ են ստացուած աշխարհիս բոլոր մասերում ապրող հայերից, որոնք շնորհաւորում են Վեհափառ Հայրապետին Կայսերական մեծ շնորհը և յայտնում իրենց երախտագիտական զգացմունքները բուն ոգևորութեան և գոհունակութեան հետ:



ՎԵՀԱՓԱՌ ՀԱՅՐԱՊԵՏՆ ԱԼԷԻՍԱՆԴՐԱՊՕԼՈՒՄ:

Օգոստոսի 8-ին հեռագիրն աւետեց Վեհափառ Հայրապետի Տփլիսից դէպի Ալէքսանդրապօլ մեկնելու լուրը: Նոյն օրը երեկոյեան գնացքով դէպի Ղարաքիլիսա ընդառաջ գնացին տեղիս փոխանորդը, գաւառապետն և քաղաքագլուխը: Ղարաքիլիսայում լսելով ծերունի Հայրապետի ժամանումն, խուռն բազմութիւն ժողովուած երկաթուղու կայարանում՝ թնդացնում էին օդը ուրախական բացականչութիւններով և ազգային երգերով, թէև որսշուած էր, որ Վեհափառը պիտի գիշերէր կայարանում իր Սալօն վագոնում, սակայն զիջանելով զարաքիլիսեցիների թախանձանքին, գնաց գիւղը և պատուեց Աբովեաններին իր շնորհաբեր մուտքով նրանց բնակարանը, ուր մնաց օգոստոսի 9-ի օրն էլ: Ղարաքիլիսայում, մինչ Վեհափառն

այնտեղ էր, խանութները փակ էին, գիւղը զարգարուած էր դրօշակներով:

Ալէքսանդրապօլում՝ ենթադրելով, որ օգոստոսի 9-ին Նսրին Վեհափառութիւնը մուտ կգործի քաղաք, բոլոր խանութները փակել էին, ոչ մի մշակ չէր գնացել աշխատանքի, այլ ամենքը խռնուած փողոցներում և յաջորդաբար՝ շուրջը, անհամբեր սպասում էին երկաթուղու գնացքին: Նոյն օրը ս. Էջմիածնից միաբանութեան կողմից Վեհափառ Հայրապետին դիմաւորելու էին գնացել Գրիգոր եպիսկոպոս Գառնակերեանցն և Սինօգի անդամ Մատթէոս վարդապետը:

Քաղաքը տօնական կերպարանք ունէր, ամեն տան ու խանութի վրա ծածանուած էին դրօշակներ, իսկ յաջորդարանի փողոց նայող պատշգամբը զարգարուած գոյնզգոյն լապտերներով, կանաչ գիրլեանդներով՝ դրասանդներով և սիրուն ծաղկեպսակի մէջ ծերունի Հայրապետի պատկերն էր դրված. գիմացի տանիքների վրա արուեստական ծառաստան էին կանգնել: Փոքր երեխաներն ու պատանիները անդադար վազվզում և աշխատում էին ըստ ամենայնի չքեղացնել տեսարանը: Յատուկ մասնաժողովը, որ ընտրված էր երիտասարդներից ընդունելութեան մասին հոգալու, ջանք չէր խնայել չքեղութեան մասին: Սակայն այդ օրը քաղաքագլխի հեռագիրը յայտնեց, որ Վեհափառ Հայրապետը Ալէքսանդրապօլ կհասնի օգոստոս 10-ի ցերեկուայ գնացքով: Այս լուրը կայծակի արագութեամբ տարածուեց քաղաքի մէջ և ամենքը գնացին իրանց դործին՝ յաջորդ օրուայ թողնելով իրանց սերախութեան արտայայտուիլը: Օգոստոս 10-ի առաւօտից հազարաւոր բազմութիւն լցրել էին փողոցներն ու երկաթուղու կայարանը: Մարդ, կին, երեխայ ամենքը դուրս էին եկել դիմաւորելու հայոց Հայրիկին, իրանց սերախութիւնն յայտնելու այն մեծ յաջողութեան համար, որ ոչ միայն եկեղեցական կալուածները յետ ստացաւ, այլ շնորհիւ նրա՝ լայն բացվեցան փակ դպրոցների դռները, որին այնքան անձկանօք սպասում էր Ալէքսանդրապօլ բազմահայ քա-

ղաքը, Վեհափառ Հայրապետի գնացքն անցնող փողոցներում՝ շարժուելու աեղ չկար։ Հինգ տեղ կանգնեցրած էին յաղթական կամարներ։ Վեհափառի պատկերները պսակների մէջ կախված էին կամարների ճակատից։ Եկեղեցական դասը շուրջառով, խաչով խաչվառով սպասում էր յաջորդարանի փողոցի ծայրին։

Ժամը 11 30-ին գնացքը կանգ առաւ Ալէքսանդրապօլի կայարանում, ուր ընդ առաջ էին գնացել Ս. Էջմիածնի պատուիրակները, Կոմիտաս վարդապետը, Ալէքսանդրապօլի հոգևոր կառավարութեան անդամները և տեղական զօրքի հրամանատարի ներկայացուցիչներ՝ մի գեներալ և մի պօլկովնիկ։ Վեհափառին ուղեկցում էին Թիֆլիսի թեմի առաջնորդ Գարեգին արքեպիսկոպոսը, դիւանապետ Յուսիկ, Ալէքսանդրապօլի և Կարսի փոխանորդներ Կիւրեղ և Մամբրէ վարդապետները, Ալէքսանդրապօլի գաւառապետն ու քաղաքագլուխը։

Կայարանում դիմաւորողները Վեհափառ Հայրապետի աջը համբուրելով ու օրհնութիւնն ստանալով՝ դուրս եկան սալօն վազոնից։ Անհամար բաղմութեան կեցցէների և զինուորական երաժշտական խմբի նուագաժութեան ուղեկցութեամբ նորին սրբութիւնը բազմեց իրեն համար յատուկ պատրաստած Խալաթեանների կառքը։ Դեռ մի քանի քայլ չէր շարժուել գնացքը, երբ կանգ առաւ, բանից դուրս եկաւ, որ դպրոցական աշակերտ պատանիները ծերունի Հայրապետին առաւել պատուած լինելու համար բաց էին արել ձիերը և իրանք էին քաշում։ Վեհափառը այս նկատելով՝ սաստիկ զայրացած ցած իջաւ կառքից և ուրիշ կառք նստելով շարունակեց ճանապարհը։ Տասնեակ հազարաւոր բաղմութեան մէջ կարգ պահպանելն անհնարին դարձաւ։ Ուղիղ կէս ժամ տևեց կայարանից մինչև յաջորդարան հասնելը։ Մուտքի առաջ երգում էր օրհորդաներից բաղկացած երաժշտական խումբը, որը Հայրիկի վեր բարձրանալու ժամանակ երգեց. «Հայրիկ, հայրիկ, քո հայրենիք...» երգը։

Վեհափառ Հայրապետը մտնելով իր սենեակները,

անմիջապէս հրաւիրեց բժ. Ն. Տէր Սահակեանին յօգնածութիւնից թոյլ զգալով իրան: Այդ օրը ոչ ոքի չընդունեց:

Երեկոյեան հրապառութիւն կար, նուագում էր զինւորական երաժշտական խումբը և տեղական զուգնան: Ժողովրդի ոգևորութիւնը անցել էր ամեն չափ ու սահման: Օգոստոսի 11-ին ներկայացան Ալէքսանդրապօլի և շրջակայքից ժողուած հայ հասարակութեան ներկայացուցիչները՝ շնորհաւորելու Վեհափառ Հայրապետին և ստանալու նրա ս. օրհնութիւնը: Ներկայացաւ նաև տեղական պարսիկների կողմից պատգամաւորութիւն, որոնք ի միջի այլոց իրանց ցաւակցութիւնը յայտնեցին հայերի և պարսիկների մէջ տեղի ունեցող թշնամական դժբաղդութիւնների առթիւ: Վեհափառ Հայրապետը նրանց յորդորեց հաշտ ապրել իրանց դրացի հայերի հետ, որովհետև Ռուսաստանի բարենորոգման այս մեծ և պատմական շրջանում միեւնոյն երկրի մէջ դարերով ապրողների եղբայրական համերաշխութիւնից կախուած է նրանց բարեկեցութիւնը:

Շաբաթ օգոստոսի 13-ին Շողակաթի տօնին ս. Փրկիչ եկեղեցում պատարագ մատոյց Գարեգին արքեպիսկոպոսը և հայրապետական մաղթանքից առաջ համառօտ քարոզ խօսեց նշանակալից օրուայ առթիւ: Ժողովուրդ քիչ կար, որովհետև այդ մասին չէր յայտարարուած:

Ամսի 14-ին վերափոխման տօնին ս. Աստուածածին եկեղեցում պատարագեց Գրիգոր եպիսկոպոս Գառնակերեանը: Պատարագի վերջին եկեղեցի իջաւ ծերունազարդ հայրապետը և օրհնեց ժողովրդին: Կէս օրից յետոյ բարեհաճեց զբօսանքի դուրս գալ դէպի Արիաշայ, որ իմանալով երիտասարդները ձիաւորուած ուղեկցում էին Նորին Սրբութեան կառքին:

Օգոստոսի 15-ին առաւօտեան գնացքով Վեհափառ Հայրապետը մեկնեց Ալէքսանդրապօլից՝ ուղեկցութեամբ Գրիգոր եպիսկոպոսի, Յուսիկ, Կոմիտաս և Մատթէոս վարդապետների, Էջմիածին-Իգդիր տանող խճուղու վրա կանգ առաւ գնացքը, ուր ժողոված էր մեծ բազմութիւն կառքերով ու ձիերով: Երբ Վեհափառ Հայրապետը երե-

ւաց վագոնից, օդը թնդաց կեցցէներով: Դիմաւորելու էին եկել Սինօզի անդամ Արիստակէս և Յովհաննէս եպիսկոպոսները և Վաղարշապատի քահանաները:

X.

— 525 —

ՎԵՀՍՓԱՌ ԿԱԹՈՒՂԻԿՈՍԻ ՄՈՒՏՔԸ

Ս. ԷԶՄԻԱՆԻՆ ՕԳՈՍՏՈՍԻ 45-ԻՆ.

Արդէն առաւօտեան հեռագիր ստացուեց Ս. Էջմիածնում, որ Վեհափառը Աղէքսանդրապոլից ճանապարհ ընկաւ դէպի Մ. Աթոռ. ուստի գերապատիւ տեղակալը Յովհաննէս եպ. Շիրակունու հետ մեկնեց Էջմիածին կայարան դիմաւորելու Նորին Սրբութեան. իսկ վանքում և գիւղում պատրաստութիւն էին տեսնում Վեհին շքով ընդունելու:

Ժամը 4-ին հնչեցին վանքի զանգերը. միաբաններն եկեղեցի շտապեցին, ուր ամեն ինչ տօնական կերպարանք էր ստացել: Ժամերգութիւնից յետոյ միաբանները շուրջառ առնելով՝ երկու կարգ շարուեցան Տրդատայ կոչուած դռան երկու կողմը, ուր սպասեցին մօտ կէս ժամ. շրջակայքը լի էր ժողովրդի բազմութեամբ. լիքն էր եկեղեցին, նորա գաւիթը և մինչև Տրդատայ դուռը տանող ամբողջ սալայատակի երկու կողմերը: Դիւղի պատշգամբները և պատերը զարդարուած էին պսակներով, երվներանգ ծաղիկներով, գորգերով, դրօշակներով, էջմիածնի և Նորին Ս. Օծութեան պատկերներով, Տրդատայ դուռը զարդարուած էր կամարակապ պսակներով, իսկ այն ճանապարհը, որով պիտի անցնէր Նորին Սրբութիւնը, ծածկուած էր կանաչ—թարմ տերեւներով և ծաղիկներով: Ծանապարհի երկու կողմը շարժական պատեր էին ներկայացնում մարդիկ, կանայք և օրիորդներ:

Բոլոր աչքերը յառած էին դէպի այն կողմը, որտեղից պիտի գար Վեհափառը: Վերջապէս մի ձիաւոր աւետեց